

Mentorenproject di Stichting Reclassering en Jeugdbescherming Aruba ta mustrandu resultado positivo

E siman aki ta Siman di Reclassering. Awe nos kier para keto un rato na un di e proyectonan di Stichting Reclassering en Jeugdbescherming Aruba, esta e “**Mentorenproject**”. Den e proyecto aki e organisacion ta “match” mentor boluntario cu un hoben, p’asina aki por yuda e hoben logra

e.o. su metanan di bida y laboral.

Mentorenproject tabata varios biaha den media e aña aki, mirando cu el a wordo nomina pa ricibi un prestigioso premio di “Appeltjes van Oranje” cu e aña aki a scoge pa premia organisacionnan cu ta haci uso di boluntarionan pa trece personanan den nos comunidad mas serca di otro a pesar di nan diferencianan.

Na juli ultimo Stichting Reclassering en Jeugdbescherming a start un campaña p’asina por haya mas mentor pa aplica n’e proyecto. E campaña aki tabata uno sumamente exitoso mirando cu 27 persona a aplica.

Stichting Reclassering en Jeugdbescherming

Aruba kier bisa danki na cada persona cu a mustra interes y a aplica n’e proyecto.

Debi n’e situacion di Covid 19 cu nos ta aden actualmente, a pone cu e fundacion mester a haci algun ahustacion y cambio interno p’e Mentorenproject por sigi.

Mentornan existente a sigi mantene contacto cu hobennan via telefon of Whatsapp, p’asina limita contacto personal, mientras e guia y sosten pa cu e hoben su trayecto ta sigi.

E mentornan aspirante lo mester a haci un training y bay dor di un procedura di seleccion, pero mirando e desaroyonan rond e “normal nobo” pa henter nos comunidad, Stichting Reclassering en Jeugdbescherming a haya su mes ta busca maneranan creativo y inovativo p’asina laga e grupo aki sera conoci cu e trabou di e organisacion y e Mentorenproject en general.

Pa cu esaki, Stichting Reclassering en Jeugdbescherming a organisa un concurso online den forma di un “quiz” usando e

program Kahoot den cual tur participante a wordo reta (challenge) den nan conocimiento di kico nan sa caba di Reclassering.

E quiz tabata consisti di 17 pregunta cu un time limit mara na dje. E participacion n’e online quiz tabata uno sumamente positivo y p’e motibo aki, Stichting Reclassering en Jeugdbescherming sigur lo sigi haci uso di programanan digital/virtual y metodonan inovativo pa trece balance den desaroyonan digital y e trabao diario di e stichting.

E tres ganadornan di e Kahoot lo wordo anuncia durante di e siman aki. Pa tur desaroyo y noticia relata na e Siman di Reclassering por sigi e Facebook page di Stichting Reclassering Aruba.

Stichting Reclassering en Jeugdbescherming Aruba ta invita un y tur pa sintonisa e programa special “A True Role Model” diasabra awor, 24 di october pa 6:30 PM, via e Facebook page di Stichting Reclassering Aruba. Den e programa aki lo por scucha di ambos mentor y clientenan, con nan experiencia cu e fundacion ta.